

CANNEN SPIRITUEL

AR


BUHÉ SANT ALEXIS.



CAVANNEN SPIRITUAL

BY

BURNE SAINT ALEXIS.



## CANNEN SPIRITUEL

AR

# BUHÉ SANT ALEXIS.

En n'emb a gâr Jesus a greisig é galon,  
Hag a ven bout eurus aveit jamæs guet-on,  
Considéret erhat buhé sant Alexis  
E ziscoei d'emb reih-mad en hênt d'er Baraouis.

É Rom é oé gânnet a guérent forh puissant,  
Péré oé istimet guet en ol dud vaillant ;  
Rac é vivein erhat, avel guîr Christenion,  
E tiscoent exampl vad partout dré er hanton.

En dud necessitus hag en intanvésèd,  
Er beurerion méhus hag en orphelinèd,  
N'ou doé quin recour meit é ty Euphémien,  
Aveit cavouèt secour ha torrein ou anquin.

Forh pèl é vivezant hemb ou dévout ligné ;  
Pedenneu a rezant liès d'en Eutru Doué,  
Ma plijhé guet-on rein ur broaidur dehai,  
De gonsolation er rest a ou buhé.

A la fin Doué touchet dré en oræsoneu  
A hrent dehou bamdé, hag ou alézoueu,  
A ras ur mab dehai péhani a vivas  
En durant é vuhé én ur santeleah vras.

Er hroaidur Alexis a ré mercheu abret,  
Durant é youanquis é tisprisé er bed :  
Dré é vuhé réglet, ean a rehé d'antant  
Penaus é oé gannet aveit devout ur Sant.

Euphémien é dad, pe zas en ouaid dehon,  
Quentéh é houlennas ur prièd aveit-on ;  
Èl m'en doé puissance hag assès a vadeu,  
Ean e vennas avance é vab én inourieu.

En Ampeleur a Rom en doé ur Brincès,  
Hag a oé deit de chom devat-ou, d'é balès ;  
Ur verh santel e oé ha carguet a zoustér,  
Hag open en dra-zé, é oent ou deu a guér.

Er Prince Euphémien hi hanavé reih-mad,  
Hag a yas d'hi goulén aveit prièd d'é vab :  
Er roué Honorius a rescondas dehon  
Penaus é oé joyus ma vezé reit dehon.

Nezé sant Alexis, aveit plijein d'é dad,  
A ziscoas é peb quis é oé ur hroaidur mad ;  
Car ean a gueméras Olimpi eit prièd ;  
Mæs guet ur glahar bras en dout hum ingajet.

Eun en doé a chom é durant é vuhé  
Guet é brièd é Rom, é léh chervijein Doué ;  
Mæs imbèr hum gavas é creis é liberté  
Dré er péh a gleuas a berh en Entru Doué.

En noz quènt éredein, Doué a gonzas doh-t-on,  
Eid en avertissein, dré révélation,  
De guitat é brièd hag é ol palésieu,  
De zisprisein er bed hag en ol inourieu.

Car, allas ! Alexis, emé en Eutru Doué,  
N'en dès nitra hemb pris meit en éternité ;  
Hag aveit bout eurus petra chervij d'oh-hui,  
Ma ne gâret JESUS mui aveid Olimpi.

Er Sant a pe gleuas er révélacion,  
Quentéh é comanças larein a huir galon :  
Ah ! ne houlennan quin, me Jesus güirion,  
Ah ! ne houlennan quin meit hou permission.

Men Doué, me zou coutant a güitat er hanton ;  
Ya, me zou coutant a greisig me halon :  
Aveit tad m'hou quemér, Jesus Salvér er bed,  
Ha hui, Güérhiès santel, aveit mam ha prièd.

Nezé sant Alexis, hemb tardein ur momant,  
Hemb larèt é avis hag é huir santimant,  
Èl ma hé a ziblas é conzas doh é voès,  
Péhani a gavas ér gambr ag hé balès.

Quer ferm é crèd é Doué, èl un Æl ag en Neu,  
Jamæs chonj n'en doé a vlessein é ineu ;  
Ean a ras seulemant d'Olimpi é brièd  
Ur groéz eur a bresant hag é bizeu ærèd.

Nezé é sortias hemb larèt mèn é hé ;  
È eur a gueméras hag er péh en doé,  
Guet eun a vou güélet é tiblassas bean mad,  
Èn habid deguiset, ér mæz a dy é dad.

D'ur porh mor é ridas beannan ma hellé,  
Hag ino é cavas, dré bermission Doué,  
Ul læstr aveit diblas ér mæz ag er hanton,  
Hag ean hum ambarquas a greisig é galon.

Quetan doar a gavas é oé Loadicé,  
Hag ino é quérhas hag en noz hag en dé :  
Idan volanté Doué hag é vam er Huérhiès,  
È arivas nezé ér guér hanvet Edès.

Inou é partajas é misq er beurision !  
Argand ha madeu bras, péré a oé guet-on ;  
É zillad hag é eur hag é ol habideu ,  
Ean ou ras d'er peur aveid é billotteu.

Nezé é has ehué de glasq en alézon ,  
A zor de zor bamdé, é misq er beurision ,  
Hag a p'en devezé mui aveit necessér ,  
Ean en dispartié d'en dud clan dré er guér.

É porchèd un ilis hag a oé forh hantet ,  
É oé é lojeris hag é ol dæmpret :  
Inou é oé placet ul limaj d'er Huérhiès  
En doé queméret aveid Avocadès.

Durant ma oé lojet er peur queah Alexis  
Én ur guér divroet, é porchèd un ilis ,  
É brièd Olimpi, é dud hag é ligné ,  
A oé é melconi hag en noz ha en dé.

Èl un druhunel peur en dès collet hé far ,  
A huélèt drest en deur é hirvoud ar ur bar ,  
Èr guis-cé é clevet Olimpi é ouilein ,  
Hemb repos na cousquèt, hemb ivèt na draibrein.

Euphémien é dad, a p'en das de gleuèt  
E oé quíteit é vad hemb larèt tra erbet ,  
A gassas mehuelleu quasi ol dré er bed ,  
De houlen quevelleu, é chonjal er havouèt.

Èl ma oent dibarès fidel ha dilijant ,  
Ind a yas de Edès é léh ma oé er Sant ,  
Hag en ou hanavas hemb disclériein dehai ,  
Ha memb a houlennas en alézon guet-hai.

Nezé en hum dennas ér mæz ag er porchèd ,  
Hag a drugairéquas Jesus én ul larèt :  
Joé a mès ém balon n'en d'on quet hanavet  
Guet dén a me hanton na guet me mehuellèd.

È durønt seitéc vlai é oé er Sant ino,  
È vihuein ér guis-cé, hemb chonjal én é vro ;  
Mæs anfin er guéris reih-mad e hanavas  
Santeleah Alexis doh é bénijen vras.

El limaj-hont a oé é porchèd en ilis,  
A revélas un dé santeleah Alexis ;  
En inour er spontas ér guis ma hré perpet,  
Rac-cé ean a gùitas guet eun a vou trompet.

Ean en hum ambarquas én desir de monèt  
Èn tural d'er mor bras, forh pèl é perhindet :  
Mæs, allas ! en tourmant hag en ahuél contrér  
A zégassas er Sant diar er mor d'er guér.

Èr porh-mor a Osty é arivas quetan,  
È vro a Intali, pe chonjé bihannan :  
Nezé é comanças ouilein dré er galon.  
Quentéh ma hanavas é oé én é ganton.

Me huél Rom, em'ean, me huél palès me zad,  
Pèla, tantation, ne fal quet d'ein tostat ;  
Petra hrein-mé berman, me Jesus, me Salvér ?  
P'en d'on deit bet aman, ha me yei bet er guér ?

Avance hardéh mad, emé en Eutru Doué,  
Quèrh de balès ha dad ha ma conservo-mé ;  
P'en d'ous bet fidel d'ein durant te ol poénieu,  
Jamæs na tilézein én ha dantationeu.

Alexis a sentas hemb resistance erbet,  
Doh er vouéh a gleuas a berh Salvér er bed ;  
Rac-cé é retornas dré é goussantemant  
D'er memb bro a hùitas dré é gomandemant.

Pe antréas é quér, quènt ma hras tra erbet,  
È pedas é Salvér hag é vam beniguèt,  
De rein ur græce dehon, d'er goarantein perpet  
Doh en tantation ha finesseu er bed.

Èl ma tè Alexis a hobér oræson  
Èr mæz ag un ilis ha poén én é galon,  
È rancontras é dad guet é serviterion,  
Èr guis ma oé é stad hag é gondition.

Er Sant a p'er guélas e yas de gonz doh-t-on,  
Ha guet un doustér vras é lavaras dehon ;  
Eutru, me zou carguet a bep sort peuranté,  
Hag ér guis ma huélet, me mès necessité.

Eutru, cleuet e mès p'en d'on deit d'er hanton,  
Ne refuset jamæs nitra d'er heurision ;  
Hanvet oh a viscoah tad en dud aflijet ;  
Hui a husq er ré nuah hag en orphelinèd ;

Hag e mès queméret en hardéhtèd ehue  
De zonèt d'hou cavouèt é creis me feuranté,  
Aveit hou supliein, é hanhue en Eutru Doué,  
De rein lojeris d'èin er rest a mem buhé.

Er Prince Euphémien, hemb hanàouèt é vab,  
Ne glasqué nitra quin meit gobér œvreu mad ;  
Hag a gomandas rein ul lojeris dehon,  
Hag open e ras soign d'ur mevel a nehon.

Mæs er mehuel ingrat hag hemb truhé erbet,  
È léh er soignein mad èl ma oé comandet,  
Èl laquas én exprès étré dihue goh vangoër.  
Èl léh ne oé jamæs na confort na splandér.

Hag open en dra-zé, en ol serviterion  
Ne ren na noz na dé repos erbet dehon :  
Er villan sotisseu ha canveu a bep quis  
A oé douçan conzeu a larant d'Alexis.

Lod a daulé doh-t-on scupadurieu en ty,  
Lod aral peb sort strong ha peb sort lousteri ;  
Réral er scrabissé hag a denné é varhue,  
Èr fin ne hrent bandé meit desirein é varhue.



Alexis a souffré guet ur guir batiantet  
A gaus d'en Eutru Doué ha d'é Vam beniguet ;  
Mæs, allas ! ne oé quet en ol anjulier-cé  
A laqué é sperèd én anquin ha tristé.

Doh un tu é cleué é dad peur é ouilein ;  
Doh un al é huélé é vam é huannadein ;  
É brièd Olimpi a varhué é crial ,  
En ur pèn ag en ty bedig er pèn aral.

Ah ! me mab Alexis ! emé Euphémien ,  
Men é oé me avis a hou ç'aliancein ;  
Mé-é a zou caus mad ma hoès me dilézet ,  
Rac ne oé quet d'hou crat quemérein ur prièd.

Ha possibl a vehé en em behé ur mab ,  
Hag em dilézhé én anquin ha huannad ,  
É léh bout héritour d'ein ha d'em ol danné ,  
Ha carguet a inour durand é ol vuhé.

Me mab a garanté , emé er vam beur-hont ,  
Petra mès groeit didé p'em lezès én hirvoud ;  
Mé mès ha conservet étre men digosté ,  
Mé mès te houlennet déguet en Eutru Doué.

Ha berman t'em dispris , dinatur a galon ,  
T'em dilès , Alexis , hemb consolation !  
Ah ! prepalet ur bé aveit me interrein ,  
Paré-eu mem buhé , ne fent quet mui bihuein.

Alexis , Alexis , a laré Olimpi ,  
Me frièd Alexis , é péh bro é oh-hui ?  
Ha possibl vé larèt é vehen intanvès  
Ag en noz destinet aveit bout Rouannès.

Scüillet , men deulegad , dareu én abondance ,  
Mal-eu d'ein ancoéhat peb sort rejoeissance ;  
Ne gavér Alexis énep léh ar en doar ;  
Doué ag er Baraouis , na brasset ur glahar !

Alexis a gleué én é léh disconfort  
En ol glahareu-zé ha réral a bep sort :  
Hag a huélé é dad, é vam hag é brièd  
E passein liès mad étal d'hon glaharet.

Alexis a vihuas ér stad truhéus-cé  
Guet ur batiantet vras en durant seitéc vlé,  
Ha jamæs n'hum glêmmas ag er serviterion,  
Nag a er boénieu bras a oé én é galon.

Rac Doué a gonservé Alexis é vignon  
Durant er poénieu-zé idan é brotection ;  
Jamæs chonj hemb quin ne dosté d'é galon,  
Na desir de sentein doh en tantation.

Ean a vivé bandé guet gùir devotion,  
Ha perpet é vezé é hobér oræson,  
Peb Sul é covessé guet gùir contrition,  
Hag en hum gonforté dré er Gomunion.

Anfin Doué a vennas recompancein er Sant  
Ag er bénijen vras hag é ol castimant  
En doé anduret aveit plijein dehon,  
Er hassas ag er bed d'er Baraouis guet-hon.

Hag open en dra-zé, Doué a laras dehon  
En dé ma varvezé dré révèlation ;  
Nezé é comanças trugairéquat Jesus  
Ag é garanté vras guet ur galon joyus.

Nezé ean a scrivas ar ur follen papér  
Er péh e anduras durant é ol amzér ;  
É hanhue a zisclérias hag ol a boént de boént  
Er péh en oblijas de gùitat é guérent.

A pen doé scrivet ha requetet Jesus  
D'el lemel ag er bed én ur momand eurus,  
É pléguas er papér én é zorn beniguèt  
Aveit gortoz en ær, èl ma oé revélet

Èl ma tispartié é gorv doh é ineu,  
È tas pront aberh Doué ur voéh a lein en neu,  
Ha dré voyand un Æl a gonzas ével-men :  
Clasquet en dén santel é ty Euphémien.

Er Pab avel er Roué, ha memb tad Alexis,  
A gleuas er voéh-cé, èl ma oent én ilis ;  
Hag ind monèt aben, hemb tardein ur momand,  
De dy Euphémien aveit guélet er Sant.

É oé é creis er place, én é gambrig tiboel,  
Goleit e oé é face idan ur goh vantel ;  
Hag a p'el lamezant é oé é faç santel  
Quer caër ha quer brillant èl pe vé bet un Æl.

Mæs a pe vennezant lemel er villetten  
A oé é dorn er Sant aveid assai el lén,  
N'el lezas quet é dad na guet dén a nehon,  
Que ne dostas er Pab d'er goulén de guet-on.

N'en dès dén ar en doar na ne vou birhuiquin  
A laro er glahar, en hirvoud, en anquin  
A oé én ur momand é ty Euphémien,  
A pe gomancezant de leine er villetten.

È dad a pe gleuas hanhue é vab Alexis,  
Hag er péh a souffras én é dy é peb quis,  
A lausquas un taul cri ihuél ha truhéus,  
Que ne sonnás é dy guet ur voéh glaharus.

En anquin a vouguas er gonz én é galon,  
Quentéh èl m'er sellas é couéhas étal d'on,  
Que ne chonjé en ol péré a oé presant  
Penaus é hé de gol isprid ha santimant.

Mam er Sant a gleuas er voéh glaharus-cé,  
Ha quentéh hi ridas aveit gout petra oé :  
Mæs er vam peur, allas ! pe hanavas hé mab  
A gouéhas ar er place semblet guet er glahar.

Er Brincès Olimpi oé d'erhlué hé hunon ;  
Perpet é melconi hag én affliction ;  
Mæs a pe zischennas, ha ma huélas hé dén,  
Hag a p'en hanavas, ah Doué! pebéh anquin !

Deoh-oé é ouilen a houdé pèl amzér,  
Ha hui oé a glasquen ha bout a oèh ér guér ;  
Diar ur guir pé deu é couéhas ahétet,  
Baiet guet en dareu, étal treid hé frièd.

Hennen-é Christenion, buhé sant Alexis,  
En n'emb a hrei èl d'on a yei d'er Baraouis ;  
N'en dé quet er madeu hag inourieu er bed  
A gondui d'er joyeu er Sænt ha Santésèd.

Allas ! na liesset é laq er péhour peur  
È ol studi ér bed, én argand hag én eur,  
È léh chervijein Doné èl m'en dé oblijet,  
E bass ol é vuhé é folleaheu er bed.

Digueor enta, péhour, digueur ha zeulegad,  
Distro doh te Grouéour ha considér erhat ;  
Considér hoah ur huéh é ma te ineu peur  
Précioussoh mil guéh aveid argand nag eur.

Sellet hoah guet truhé, Jesus Salvér er bed,  
Sellet hoah a druhé doh ur péhour calet ;  
Distâguet é galon doh inourieu er bed,  
Hag ansaignet dehon en hènt de vout salvet.

FIN.